



Број/Број: 03-/4-50-1-10-8-13/08
Сарајево/Сарајево: 17. 1. 2008. године

ZAPISNIK

8. sjednice Zajedničke komisije za evropske integracije Parlamentarne skupštine BiH, održane 17. 1. 2008. godine

Sjednica je počela u 10 sati.

Osmu sjednicu Zajedničke komisije za evropske integracije Parlamentarne skupštine BiH sazvaо je predsjedavajući Halid Genjac.

Sjednici su prisustvovali članovi Zajedničke komisije: Halid Genjac, Drago Ljubičić, Zoran Koprivica, Alma Čolo, Šemsudin Mehmedović, Rudo Vidović, Selim Bešlagić, Hilmo Neimarlija i Branko Dokić, te Vladana Lučić, privremeni sekretar Komisije, i Sabina Pstrocki, pripravnik-volonter. Azra Hadžiahmetović, Milica Marković i Ivo Miro Jović opravdano su odsustvovali.

Sjednici su prisustvovali i članovi Misije OSCE-a u BiH – Program podrške parlamentu: Elma Kadić, Matthew Oakley i Uranela Erceg, te predstavnici medija.

Sjednicom je predsjedavaо predsjedavajući Zajedničke komisije Halid Genjac.

DNEVNI RED

1. Usvajanje Zapisnika 7. sjednice Komisije;
2. Razmatranje Plana rada Komisije za 2008. godinu;
3. Tekuća pitanja.

Ad. 1. Usvajanje Zapisnika 7. sjednice

Nakon što je jednoglasno usvojen dnevni red, prisutni članovi jednoglasno su usvojili i Zapisnik 7. sjednice Komisije koji im je ranije dostavljen.

Ad. 2 Razmatranje Plana rada Komisije za 2008.godinu

Predsjedavajući Komisije Halid Genjac predstavio je Prijedlog plana rada Komisije za 2008. godinu. On je rekao da će 2008. godina biti posebno važna za rad Komisije, s obzirom da je nedavno parafiran Sporazum o stabilizaciji i pridruživanju, ističući da četrdesetak zakona kasni sa usvajanjem, a kratkoročne i dugoročne obaveze čekaju Bosnu i Hercegovinu poslije potpisivanja Sporazuma. Predsjedavajući je rekao da je u *Izveštaju o napretku BiH u 2007. rad* Komisije ocijenjen kao nedovoljan, te naglasio da bi Komisija trebalo da intenzivira saradnju s entitetskim komisijama, vladama i parlamentima, čije su aktivnosti usmjerene na proces integriranja. Aktivnosti iz Plana rada koncipirane su prema obavezama Komisije, a Komisija će dati prijedloge u vezi s evropskim integracijama koje treba uvrstiti u Orijentacioni radni plan oba doma Parlamentarne skupštine BiH. Prijedlozi i mišljenja Komisije za Orijentacioni plan rada oba dom treba da budu dostavljeni domovima do kraja januara. Predsjedavajući je još naglasio da postoji osam ili devet ključnih prioriteta koje treba ispuniti prije potpisivanja Sporazuma o stabilizaciji i pridruživanju, a Komisija mora tome doprinijeti u narednom periodu, u saradnji sa svim akterima na državnom i entitetskom nivou.

Predsjedavajući je naglasio da je u martu predviđena analiza materijalnih i kadrovskih kapaciteta Direkcije za evropske integracije. Također je planirana posjeta Komisiji za evropske integracije Republike Hrvatske, uz podršku OSCE-a. U aprilu je predviđeno nadgledanje izrade Strategije za prevođenje *Acquis Communautaire* i analiza postprijemnih obaveza prema Vijeću Evrope. Komisija je, prema poslovnici, nadležna za praćenje ispunjavanja postprijemnih obaveza BiH u Vijeću Evrope. Od aprila je predviđeno organiziranje javnih tribina o temi integracija u skladu s prijedlozima članova Komisije na jednoj od prethodnih sjednica. Za maj je predviđena ekspertna prezentacija programa prepristupne pomoći (IPA), kao i primjene ovih fondova u Bosni i Hercegovini. Također je potrebno da Komisija razmatra *Dokument za višegodišnje indikativno planiranje 2007.-2013. (MIPD)*, koji će u maju članovima Komisije prezentirati DEI. U Planu rada predviđena je i posjeta svih članova Komisije Briselu, a do sada je jedna grupa bila u studijskoj posjeti, koju je organizirao Nacionalni demokratski institut (NDI). Za organizaciju posjete Komisija će tražiti podršku NDI-ja, a očekuje se pomoć od OSCE-a i USAID-a. Predsjedavajući je naglasio da bi dio sredstava za ovu posjetu trebalo da bude osiguran iz budžeta Komisije

Za juni je planirano da Komisija da ocjenu budžeta DEI-ja za narednu godinu i da razmatra budžet ostalih institucija Vijeća ministara BiH koje su uključene u proces evropskih integracija. Za juli je planiran sastanak i koordinacija rada sa srodnim komisijama entitetskih parlamenata, a za septembar je predviđena analiza korištenja sredstava u prvoj polovini godine i to i od Komisije i od nadležnih ministarstava. U oktobru se planira sastanak s entitetskim parlamentima, analiza posljedica primjene CEFTA-e, a u novembru analiza rada Komisije s prijedlogom unapređenja, te analiza javnih kampanja u vezi s evropskim integracijama. U decembru je predviđena analiza aktivnosti svih institucija u 2008. godini koje rade na ispunjavanju uslova za pridruživanje EU i prioriteta u procesu integracija.

Nakon što je izložio Plan rada, predsjedavajući Komisije zatražio je od prisutnih da iznesu svoje prijedloge i sugestije.

Zoran Koprivica iznio je nekoliko zapažanja u vezi s Planom rada Komisije. On je predložio da se nadležnosti Komisije, definirane poslovnici, navedu u Planu rada. Dao je i prijedlog da DEI kvartalno prezentira informacije o stadiju procesa integracija. On je pitao šta se

dogodilo s posjetama parlamentima Danske i Češke koje su također bile planirane ali nisu realizirane i da li postoji mogućnost da se i one uvrste u Plan rada za 2008. godinu. Koprivica je predložio da svaka dva mjeseca Komisija sumira i analizira obaveze i prioritete vezane za proces integracija i predložio da članovi Komisije aktivno učestvuju u toj analizi.

Alma Čolo informirala je prisutne o sastanku Pakta stabilnosti za Jugoistočnu Evropu, održanom početkom decembra u Tirani, na kojem je potpisala Memorandum o interparlamentarnoj saradnji u ime Parlamentarne skupštine BiH. Na tom sastanku Komisiju su predstavljali: Alma Čolo, Branko Dokić i Ivo Miro Jović. Čolo je naglasila da od ove godine obaveze Pakta stabilnosti preuzima Regionalni centar za saradnju sa sjedištem u Sarajevu i predložila da se u Plan rada za 2008. godinu obavezno unese i posjeta Regionalnom centru za saradnju. Ona je predložila da Komisija već u januaru pokrene inicijativu za imenovanje koordinatora za interparlamentarnu saradnju, te da se o tome uputi pismo kolegijima oba doma. Alma Čolo predložila je da se u februaru održi sastanak s Komsijom za vanjsku i trgovinsku politiku, carine, saobraćaj i veze Doma naroda i Komisijom za vanjske poslove Predstavničkog doma, kako bi se jasno utvrdile procedure imenovanja predstavnika BiH u međunarodnim institucijama. Od 2002. godine čeka se predstavnik BiH u Vijeću za torturu i on još uvijek nije imenovan, a kada je postavljeno pitanje kako je imenovan predstavnik BiH na Sudu za ljudska prava u Strasbourgu, niko nije mogao dati odgovor. Predložila je da ove tri komisije zajedno rade na ovom problemu, te iniciraju uspostavljanje jedinstvene procedure za izbor. Ona je predložila i osnivanje radne grupe, koja bi uradila ovaj posao. Alma Čolo je također predložila da se, prilikom razmatranja budžeta, predvide dodatna sredstva za rad Komisije, te da Komisija ne treba da se oslanja isključivo na milost međunarodnih institucija i donatora, kao što je NDI ili OSCE, nego da treba imati budžet kako bi mogla i sama finansirati posjete Briselu ili parlamentima i komisijama drugih država.

Branko Dokić podržao je prijedlog Zorana Koprivice da se u uvodnom dijelu Plana rada navedu sve poslovničke nadležnosti Komsije. Rekao je da se ne slaže s tačkom u Planu rada koja predviđa razmatranje kadrovskih i budžetskih kapaciteta DEI-ja zato što Komisija treba indirektno komentirati te kapacitete, a postoje i druge institucije s kojima Komisija usko saraduje i čije kapacitete treba također analizirati. On je predložio da se organizira posjeta u Bugarsku ili u Rumuniju, i podsjetio da je, kada je riječ o korupciji, iako je Rumunija članica EU, situacija u BiH mnogo bolja. BiH ima negativan imidž koji je potrebno promijeniti, a prema izvještajima Transparency Internationala, bolja je u regiji i od Hrvatske i od Srbije. Treba vidjeti šta su Bugarska i Rumunija napravile po određenim pitanjima, a posjeta Hrvatskoj je također dobar prijedlog. Na kraju je dodao da Komisija treba zatražiti odgađanje sjednice Predstavničkog doma planirane za 5. februar zbog 10. interparlamentarnog susreta kojem treba da prisustvuju svi članovi Komisije.

Halid Genjac naglasio je da će Komisija na narednoj sjednici razmatrati Izvještaj o radu za 2007. godinu, a da Sekretarijat Komisije ima obavezu da sakuplja sve informacije vezane za evropske integracije. On je zatim govorio o institucijama COSAP-a i COSAC-a koje su radile na koordinaciji rada komisija za evropske integracije u regionu, te da treba provjeriti šta se trenutno dešava s tim institucijama i zašto u posljednje vrijeme nema nikakvih inicijativa s njihove strane.

Selim Bešlić predložio je da se tačka u Planu rada, analiza materijalnih i kadrovskih pretpostavki za rad DEI-ja, preformulira i da se napiše da Komisija ima zadatak da napravi

kadrovsku i tehničku analizu kapaciteta DEI-ja, a ne budžetsku, kako bi se ocijenilo da li je Direkcija spremna da ispuni svoje obaveze nakon potpisivanja Sporazuma o stabilizaciji i pridruživanju. Što se tiče posjeta, sve koje su moguće i izvodive, Komisija treba realizirati. Govoreći o proceduri imenovanja u međunarodne institucije, u kojima sve zemlje imaju po jednog člana, ne može se očekivati da BiH delegira tri člana. Bešlagić je na kraju rekao da se nada da će Komisija ispuniti barem 75% od onoga što je predviđeno Planom rada.

Rudo Vidović nije imao primjedbi na Plan rada i smatra da konkretne posjete drugim komisijama, kao i putovanja u inozemstvo zavise od nekih drugih faktora, kako je i naglašeno u jednoj od napomena Plana rada, te da realizacija sadržaja rada Komisije zavisi od usklađivanja s aktivnostima drugih relevantnih institucija.

Sumirane su sve primjedbe i nakon rasprave zaključeno je:

- da se u uvodni dio Plana rada uvrste sve nadležnosti Komisije prema poslovnica domova Parlamentarne skupštine BiH,
- da se u Plan rada uvrsti posjeta Regionalnom vijeću za saradnju,
- da se "budžetska analiza kapaciteta" preformulira u "analizu tehničkih i kadrovskih pretpostavki potrebnih za uspješan rad DEI-ja",
- da je potrebno pokrenuti inicijativu i održati zajednički sastanak s Komisijom za vanjsku i trgovinsku politiku, carine, saobraćaj i komunikacije Doma naroda i Komisijom za vanjske poslove Predstavničkog doma, na kojem bi se jasno utvrdile procedure kod imenovanja kandidata iz BiH u međunarodne institucije.

Plan rada Komisije jednoglasno je usvojen s ovim izmjenama.

Ad. 3 Tekuća pitanja

Pod tekućim pitanjima razmatrane su dvije teme:

- 1) 10. interparlamentarni susret
- 2) Seminar u organizaciji OSCE-a predviđen za 14. i 15. februar.

Za 10. interparlamentarni susret iz Brisela je dostavljen Nacrt programa posjete i nacrt dnevnog reda. Članovi Komisije dali su svoje sugestije i komentare na prijedlog dnevnog reda. Predloženo je da se kao tačka dnevnog reda uključi i Informacija o pretpristupnim fondovima i mogućnostima njihovog korištenja u Bosni i Hercegovini. Neke od tema prošlog Interparlamentarnog susreta, kao što je Reforma javnog RTV servisa, čekaju odluku Parlamenta Federacije BiH i na Ustavnom sudu, pa Komisija po tom pitanju ne može ništa učiniti.

Zoran Koprivica predložio je da se za 10. interparlamentarni susret pripreme relevantni materijali, te da se na narednoj sjednici, pred sastanak, članovi Komisije dogovore o svojim izlaganjima u okviru dnevnog reda.

Dogovoreno je da će Alma Čolo imati uvodno izlaganje o temi: *Rad pravosuđa i borba protiv korupcije*, Halid Genjac o *Reformi ustava*, Šemsudin Mehmedović o *Reformi policije*, Rudo Vidović o *Jedinstvenom tržištu i ekonomiji*, a Branko Dokić o *Regionalnoj saradnji*.

Članovima Komisije podijeljen je preliminarni nacrt dnevnog reda seminara s temama i predavačima. Predsjedavajući Komisije ocijenio je da su teme dobro odabrane i aktuelne, te još

jednom pozvao članove Komisije da neizostavno prisustvuju seminaru. Seminar je posebno važan za Zajedničku komisiju za evropske integracije, iako je predviđen za sve parlamentarce.

Sjednica Komisije završena je u 11,30 sati.

Predsjedavajući
Zajedničke komisije
Halid Genjac